

為經法亦名法聚何以故解惑立名不同體
解究竟名為秘密真藏迷惑立名同體相解
名為衆生亦名生死亦名苦聚亦名顛倒亦
名外求何以故衆生不解名之為惑以是緣
由不識自身自身之中有無量法聚具三清
境衆生迷惑遂使外求不信正法不求善友
名為衆生將法逐法迷沒世間從劫至劫終
無曉了若遇善知識者名為宿緣種其福德
何以故昔因今果得遇天尊為其說法顯無
上真藏秘密重玄了達昔因證今生果善男
子汝等若欲求者先當自求若自求者秘密
法現廣開真藏顯三寶源以此法藏統收諸
法盡無邊底惠力童子白
天尊言大師所說教諸衆生若求法者先當
自求若自求者秘密法現廣開真藏顯三寶
源雖聞聖說不能解了不知何者為道何者
為法何者為師何者為衆何者為內何者為
外以不知故願為說之
天尊告惠力童子諸善知識汝所問者問於
自求真藏法現汝今澄神靜處吾今廣為說

之一切衆生身性清淨天真正道隱在其中
名為真藏此真藏昔無內無外無法聚無衆
生聚無道德聚究竟寂滅名為秘密隱為冲
寂顯為應妙廣示多途能開物障利益深遠
諸仙童子及諸眷屬天仙子無量善衆歡
喜歎曰善哉善哉天尊功德普照無窮潤益
蒼生平等無礙
天尊告諸四衆及大弟子當來衆生若有讀
誦受持講說真藏經者此人功德不可思議
則見我身成無上道何以故此經說諸法根
本利益深切功德廣遠難可譬喻若有衆生
信心讀誦捨諸他念即得道眼照三世因緣
平等無礙悟因非因悟果非果達身心相非
心不心亦不心是真心相相無所相無相
之心通周法界法界之相不生不滅前際不
去後際不來今不往古古不來今今古一相
一無所相隨分解脫湛寂無為功德具足爾
時四座同聲唱言歎法微妙真藏大乘功德
希有奉辭專頌泣涕還國
无上內秘真藏經卷之二

无上內秘真藏經卷之三

洪十

解脫品

是時元始天尊遊居濟生國土檀林園中與
諸眷屬四方雲集無量等衆各各莊嚴到檀
林園聽天尊說爾時天尊在虛空中端然不
動莊嚴妙麗坐師子座宣揚正法時善明童
子在大衆中忽然而起稽首道前上白天尊
大慈希有善慶羣生念諸徒衆今發善心修
无上道不害行何行觀何法調理身心
天尊曰善哉善哉如汝所問濟生國土宣揚
正法度諸衆生汝今諦聽吾為汝說善男女
等各發善心修无上道調伏其行滅諸魔賊
守一潛生平等無二作如是行作如是觀一
切羣生有識無識有形無形皆悉正慧成无
上道如是成道無量法界諸天品類羣生實
無羣生得成道者何以故若有羣生可行可
觀有身相者有滅度者有成道者有失道者
即壞世法所謂入諸法界而行智慧入諸煩
惱而行智慧入諸生死而行智慧入諸貪愛
而行智慧入諸國土而行智慧入諸山林而

行智慧入諸異類而行智慧入諸非法而行智慧入諸無間而行智慧一切諸法微妙深遠無入而入此之功德不可思議善明童子汝等云何五色六情四惑可求得不可以有身證成道不可以有相求無相不可以眾生求道性不也天尊

天尊曰一切法相皆非法也若鑒諸法寂滅無生相無住相無滅相則見道果諸善男女聞如是大乘秘密經典而生不信此人從無量劫來受六畜身致生我慢不信三寶不信真經我說秘密真藏有大弟子修行讀誦講說尊經於此真藏能生信心常行不怠當知是人於諸天尊所施行功德而種福田無量劫來遵行大乘今遇此經生諸信心不住空有而求道者不住非空非有而求道者不住非非有非非空而求道者不住色聲而求道者不住非色非聲而求道者不住非非色非非聲而求道者不住智慧而求道者不住非非智非非慧而求道者復告善明童子我之圓應悉知悉見了

達眾生知其根性照三世因何以故見知眾生有心取相者則生煩惱則生顛倒則生死壞若非心而取非相而取非法而取非善而取非見則壞世法斷諸善相汝不應取有捨無取無捨有取以是義故我常顯法法常

明明法無相無非法相無非非相汝等徒眾知我說意譬如虛舟汎浮清濁無意而浮任人東西到所岸者捨舟便去况非舟耶善明童子天尊證成道果耶有所說法耶

天尊曰一切諸法無有定相亦無定法究竟空寂若言我所說者則謗我法若言有法證成道者則壞世法何以故諸法微妙無有非法非非法盡為功德無有差別所以爾者一切眾生習業不同皆從微妙而有差別當知差別非差別善明童子汝等云何若人行是功德於五感世界金玉重寶並悉捨施此人所得功德以為多不善明童子甚多天尊所說功德奇特希有若人於此經講說書寫受持供養此人所得功德勝彼百千萬倍何以故一切僊真上聖皆從此經而成道果若無

此經而成道者終無有是當知此經功德非可格量所謂道果即非道果而為道果所謂三空四惑皆有所受即非道果而為道果何以故我行一行絕諸有漏於法相中最高第一善明童子汝等徒眾各淨國土離色香觸

莊嚴妙麗以為法界瑩飾其心是心非心名為大心是名功德不可思議若有善男女等盡心供養講說讀誦當知是人功德第一成就羣生希有之法此經所在之處皆有道慧神通妙力善教法懷金剛童子隨處涌出護持法藏不得輕泄

爾時善明童子上白
天尊當何修此經我等徒眾云何受持
天尊曰修此經者無文無字斷諸漏行證真法藏此經名為慧力法城善護羣生除邪惑障我說一切諸法即非諸法故名為法城我說一切微塵即非微塵非微塵故名法城我說一切異類國土即非異類國土非國土故名為法城善男子汝等若於真藏法中能行一字或他方界為人講說其福廣大不可稱

01A920-2

量若於半法修行證全法者功德甚重與彼無量善明童子聞說是經悟解其義涕淚泣淚恨不早聞希有天尊說如是真藏深法度諸衆生我昔以來學小乘行所得法眼達理未深不曾得聞如是秘密大乘經典今遇天尊授我妙藥令得受持信心定志莊嚴功德希有第一

天尊曰所說功德實相即非功德實相非相非非相是名功德實相若能徹思達解功德實相者證法不足爲難何以故離一切微塵相故則是一切諸正真法善男子若有人得聞此經此人即得金剛力得元長心當知此人元量劫來修習此經勤行不懈復告善明童子一切衆生非有非非有非無非非無非心非非心是名悟解是名真實是名功德善男子我非誣說非妄說非感說非異說若有法可修可愛可住可去可爲可得則壞正真緯諸法性失諸功德不見道源不慈不孝冥冥闇室無解無出復次善明童子若有人忽聞此經心念不逆當知此人功德無量況書

寫讀誦爲人講說功德不可思議善男子在處處皆有此經何以故不受聞見不受香味觸達諸法性是人悉見此經則得功德名爲供養名爲受持善男子應須恭敬應須供養功德甚重復次善男子若有人常行大心勸人修善讀誦此經功德廣遠不可格量復次諸善知識各自慎慎勿輕繼輕繼之者其罪甚重難可譬喻終劫說之亦不能盡其人無根宿無善念唯罪是務或聞善法心則狂亂狐疑不信當知此人難可勸化生死罪報無有限量

爾時善明童子復白天尊一切衆生善男女等發心求無上道云何發心心云何行行云何調理云何證道云何滅衆生行而成道果天尊曰一切衆生善男女等發心求無上道者云何所疑而作此問我本無生而無有滅一切衆生亦復如是無生無滅無住無去無人無我究竟平等實無有法發心求無上道者我於大慧之所所有一切法聚皆是大慧之本善明童子汝解如是說解如是義善明

童子所解天尊說義於大慧之所者實無衆生可求道者亦無衆生而得道者

天尊曰無說無聽以無說而無聽受之以無衆生而無衆生受之以無法而無法受之不壞世法而爲道果爲道果者無得無失無生無滅無憂無苦無顛無倒一切諸法皆是正道所言正道者無一切法亦無正法是名真法非真非真而名道果善明童子問

天尊言大慧具五眼不天尊答曰實具大慧有肉眼有法眼有慧眼有功德眼有道眼何以故肉眼即是法眼慧眼功德眼名爲道眼衆生即是法身慧身功德身名爲道身何以故一切法界名爲道身但妙之衆數不能盡一切衆生異國殊心種種色相類聚羣分道眼悉知何以故天尊所顯色相殊心即非有心非色相心非心不心亦非不心非相不相亦非不相非過去心亦非非心非未來心亦非非心非現在心亦非非心當知法力甚深功德微妙秘密真藏難可譬喻得其邊底善明童子歡喜歎曰善哉

善哉四衆各各伏地同聲讚歎而說頌曰
 天尊顯法王 微妙無虛假 功德隨心王
 慧深無不普 種種色相好 大心平等土
 度脫諸衆生 銷滅三塗苦 四衆各得法
 法城自然觀 迷者不信真 沉淪繫在五
 天尊善方便 說法無偏普 道眼一時照
 狐疑無不洗 五陰豁朗開 六情不相染
 方寸堅得道 思微志可顯
 爾時大衆說此頌已歎大慈尊顯諸法性自
 在神力我等徒衆不能顯了何以故天尊所
 說法即非說法若言天尊說者即是壞法即
 是毀法即是謗法即是滅法何以故不解天
 尊意故惟願天尊隨機為說
 天尊曰我得成無上道者為無所得覺法空
 寂覺無所覺寂無所寂無覺而覺無寂而寂
 證法理故名無上道無法可證無道可顯故
 名得道復次善男子等諸法平等無高無下
 無生無滅無去無來是名無上道果我今所
 說非法名為法王悉為自在若有人於此經
 中修行一句為人講說勸人受持讀誦所得

功德億千萬倍非可譬喻恒沙算數不能盡
 或有捨身毀碎或有投身餓虎或有火焚身
 命或有繫業因果捨施求福如此功德甚薄
 法力不成何以故無慧解故無通達故自證
 自求自得自我如是自縛障無明障假使碎
 身如恒河沙塵塵成灰土終無有盡以無盡
 故繫業不除業業相牽云何解脫汝諸徒衆
 各自思惟勿生懈怠勤行智慧證果須臾天
 尊於是而說頌曰
 法王遍法界 濟度諸衆生 慈恩惠澤普
 斷滅為法城 寶珠非內外 照曜甚分明
 汝等諸徒衆 迷惑不能行 徒勞修善行
 萬劫亦無榮 忘身自無我 功德坦然平
 常行不懈怠 魂神無有驚 我今顯法王
 了了常清淨 悟解由方寸 緣緣等無病
 功德遍法界 何假虛嗟歎 汝等須努力
 勤行無堅硬
 天尊說此頌已告諸徒衆汝等深心伏聽告
 示諸法非外非內非長非短非去非來非虛
 非假微妙宛約百寶莊嚴功德具足非可顯

名所說功德非功德是名功德所說證果非
 證果是名證果所說得道非得道是名得道
 悟解深解名為大乘所說大乘非大乘是名
 大乘所說法界非法界是名法界遍入沙塵
 非沙塵是名沙塵如是微妙功德非可譬喻
 諸像等衆聞如是說驚怖振惶汗流至踵各
 各自思俄頃之間遂經一劫得悟大乘證無
 上道
 天尊曰不以具足智慧而得成道不以具足
 相好而得成道不以具足煩惱而得成道不
 以具足諸塵而得成道不以具足法寶莊嚴
 而得成道不以具足法界而得成道不以具
 足布施而得成道若有善男女等能悟一切
 諸法大自在玉平等究竟此人功德不可思
 議諸得道者不受功德不受智慧不受諸行
 不受慈悲不受忍辱善明童子小白
 天尊云何諸像學道不受功德不受智慧不
 受諸行不受慈悲不受忍辱
 天尊曰大乘法印諸漏永斷云何貪受功德
 云何有貪受智慧若有善男女等說言天尊

應見有來有去者此人迷惑不解我說當知
天尊平等無二故名天尊若有人於法界以
爲微塵比塵之數以爲多不諸億等甚多
天尊曰如我說法百億日月百億星宿數未
及其一何以故我說法界非法界而爲法界
我說衆生非衆生而爲衆生我說得道非得
道而爲得道衆生貪著事事取捨生死變易
迷惑神魂失平等性若有男女等捨身盡諸
世界所有珍寶布施此之功德以爲多不諸
億等甚多若有人受持此經爲人演說不著
諸相不著諸相不證我人不一諸理此之功
德不可稱量勝彼百千萬億此之功德百千
萬億分亦不及其一當知此經功德甚重不
可稱量爾時四座於靈解山及諸天尊衆悉
皆悟解念然稱善稽首讚歎天尊廣演大乘
濟無邊衆各自願報我國王思天尊力由
我國王覆育我等致得尋真求學聖道我等
隨緣得悟難可思議善男女等人身難得努
力勤行勿生懈怠一失善道萬劫無期
天尊曰善哉善哉諸徒衆等並有宿緣根機

易解聞此大乘信此勤行玄心遠念離空有
相證法無生汝等四衆各率衆緣隨機化導
勿滯一方悟諸緣理我願真藏大乘經典付
屬國王并大弟子留傳宣布濟沉溺苦大乘
甘露其味希有得比味者無生無滅無去無
來湛然常住究竟道場若有毀謗不信此經
此人見世惡業所種死入鄴都中府風刀之
考鬼神誅役一十四曹曹一考官百二十考
吏一千二百考兵一萬二千考主三河九江
四瀆溟波死魂作役如是考對痛毒難勝天
尊於是重說苦魂而作頌曰
爲人不信法 毀謗於賢良 受死鄴都報
劍樹碎形傷 萬劫劫無期 魂神痛斷腸
叫聲聲不絕 獄卒淬鏹湯 受報無休息
嗔眼四邊張 誰能受此苦 迷惑亂猖狂
寄語修行子 修福永無殃
天尊說此頌已告諸四衆善男子等各各勤
行禁諸四患行平等心學大乘道三使永畢
六通智慧得無畏心善明童子及諸四衆歡
喜無量頂戴不勝慧心定志受教奉行從身

至身從劫至劫普無退轉稽首作禮各還本
國

无上内秘真藏經卷之三